



Quartu Sant’Aleni

NOVAS IN SARDU

mesi de maju

Su progetu “Sa lingua in Quartu” est finantziau de sa Regioni Autònoma de Sardìnnia cunforma a sa L.482/99 “Normas in matéria de amparu de is minorias linguísticas stòricas” e a sa L.R. 22/2018. S’ufitziu de sa lingua sarda est in sa Biblioteca de is minorias linguísticas, a disponimentu de scolas, assòtzius, atividadis cumertzialis e de is tzidadinas e tzitadinus chi bolint imparai a ligi, scriri, fueddai in sardu; po cursus de formatzioni in lingua sarda, tradutzionis, consulèntzias.

02/05/2024: Comunu de Quartu Sant’Aleni: aprovau su rendicontu. Su 29 de abrili 2024 su Consillu Comunali de Quartu Sant’Aleni at aprovau su Rendicontu de sa gestioni 2023 e sa relata de sa Giunta Comunali.

03/05/2024: Rassìnnia “VIACONVENTO”: Giuseppe Tiroto presentat “La stanza chiusa”. Po sa Rassìnnia “ViaConvento 2024” in sa Sala de is pinturassighint is appuntamentus cun sa literadura sarda. Mèrcuris, s’08 de maju 2024 a ora de is 18:00, in s’Ex Cunventu si presentat su libru “La stanza chiusa”de Giuseppe Tiroto. Nd’arrexonat cun s’autori Duilio Caocci, cun interventu de Dario Cosseddu. S’intrada est libera e sena de prenotatzioni.

03/05/2024: Laboratòrius de pintura in is Tzentrus sòtziu educativus in tzentru tzitadi e in Flùmini. Sighint is initziativas in is Tzentrus Sòtziu Educativus de Quartu. In su mesi de maju funt in programa 5 laboratòrius de pintura, po promovi sa sotzialidadi. “Di favola in fiaba – Coloriamo insieme”funt cincu laboratòrius de pintura aprontaus de is artistas Gianluca Petrini e Luigi Lai.

04/05/2024: Parternariau po sa cualificatzioni energètica noa de is edifitzius comunalis. Un’investimentu de 16 millionis de èurus, po 16 annus de cuntzessioni, chi promitit de portai profetu mannu siat operativu chi gestionali e arrespàrmiau po s’aministratzioni comunali de Quartu Sant’Aleni. Est sa proposta de afidamentu de su servìtziu de “Energia e gestione integrata degli impianti tecnici, di condizionamento ed elevatori degli stabili del comune” (Energia e gestioni integrata de is impiantus tècnicus, de cunditzionamentu e elevadoris de is stàbilis de su comunu), aici puru àterus servìtzius smart, aprovada de su Consillu Comunali. Imoi s’at a fai sa gara e agoa at a intrai in vigèntzia su regimi nou cun is chi s’ant a ajudicai sa cuntzessioni.

06/05/2024: Su 19 de maju sa de 25 editzionis de “Bimbimbici”: initziativa po sa mobilitadi sustenìbili. Torrat “Bimbimbici”, sa manifestatzioni natzionali promòvia de sa “Federazione Italiana Ambiente e Bicicletta (FIAB)” e organizzata paris cuns’Aministratzioni comunali, chi bolit promovi sa mobilitadi sustenìbili.

06/05/2024: In su Parcu de Molentàrgius su “Pet Day”: sfiladas, prèmius e adotzionis. Cun prus de 200 bisitadoris e medas amigus animalis, sa manifestatzioni “Pet Day”, chi s’est fata domìnigu, su 05 de maju 2024, in su Parcu Naturali Regionali Salinas-Molentàrgius, at tentu resurtu bonu meda, cun sfiladas, prèmius e adotzionis.

06/05/2024: Monumentus Abertus 2024: setimilla presèntzias in tzitadi. Un’acabu de cida de cultura in Quartu Sant’Aleni, cun s’editzioni 2024 de Monumentus Abertus, cun sa partecipatzioni de medas bisitadoris. Est una testimonia de importu mannu po su patrimoniu culturali e stòricu-archeològicu de sa tzitadi.

07/05/2024: Cumentzat sa sperimentatzioni de sa limpiadura de is stradas a su noti. Su primu lunis de su mesi est cumentzada sa sperimentatzioni de su servìtziu de limpiadura de is stradas a su noti. Sa primu fasi at interessau sceti pagus stradas de sa tzitadi, calincunu strobu po mori de veturas in sosta.

07/05/2024: Garanti de is diritus po s’infàntzia e s’adolescèntzia: primu atòbiu in Comunu. Apustis de sa nòmina de sa Garanti est cumentzada sa fasi operativa po Sa Dotora Maria Greca Piras, ex Dirigidora Scolàstica e giai coordinadora de unus cantu progetus po su Ministeru de s’Istrutzioni, oindii Garanti tzitadina de is diritus po s’Infàntzia e po s’Adolescèntzia.

08/05/2024: Biblioteca Flùmini: leturas e laboratòriu ecològicu creativu po pipius. Sighint is iniziativas po pipius ainturu de sa manifestatzioni “Maggio dei libri 2024” in sa Biblioteca de Flùmini in bia Mar Ligure. Cenàbara, su 10 de maju 2024, a ora de 09:30 in programa ddoi at unu laboratòriu de letura ecològicu creativu dedicau a is abis.

08/05/2024: Fuglierias e tramperias a is antzianus: seminàriu informativu in Pratzza IV Novembre. Cenàbara, su 24 de maju 2024, a ora de is 16:30, in su Tzentru Sòtziu-Educativu Intergeneratzionali (po totu is edadis) de Pratzza IV Novembre s’at a fai unu seminàriu informativu po sa preventzioni de is tramperias a dannu de is antzianus.

09/05/2024: Screening a indonu promòvius de Anteas. Su screening a indonu aprontau de s’Assòtziu Anteas Quartu Sant’Aleni, paris cun su patrotzìniu de su Comunu, praxit a is tzitadinus. Sa preventzioni est de importu mannu po amparai sa saludi de totus, duncas is tzitadinus funt abetendi cun interessu is appuntamentus imbenientis.

10/05/2024: Rassinnia “VIACONVENTO”: Eugenio Milia presentat su libru 'Geomusica'. Mèrcuris, su 15 de maju 2024, a ora de is 18:00, in s’Ex Cunventu de is Paras de bia Brigata Tàtari, sighit sa rassinnia “ViaConvento 2024”, cun s’autori Eugenio Milia, chi presentat su libru “Geomusica – Dai crini del cavallo alle penne del Condor” (Youcantprint, 2023), cun sa partecipatzioni de s’illustradora Francesca Savona. Nd’arrexonat cun s’autori Massimiliano Medda, de sa cumpangia teatrali Lapola.

10/05/2024: Cursu de lingua sarda: segundu cursu de livellu basi in su Tzentru Sòtziu Educativu po totu is edadis in Pratzza IV Novembre. Apustis de su primu cursu de lingua sarda, cumentzau su 09 de abrili e chi at a acabai s’11 de làmpadas 2024, iniziativa noa ainturu de su progetu “Sa lingua in Quartu”, aprontada de su Comunu de Quartu paris cun s’Assòtziu “Sa Bèrtula Antiga”, cun su contributu de sa Regioni Autònoma de Sardìnnia. Iscritzionis abertas fintzas a su 23 de maju 2024.

10/05/2024: Progetus de coesioni sotziali: cun su Grupu Scout Agesci 3 GESCI 3 is progetus “Crea e Aiuta”. Atividadi e laboratòrius po pipius, picocus, giòvunus e àterus, po favoressi s’acuisitzioni de connoscèntzias e cumpetèntzia noas in contu de comunicatzioni, mùsica, primu interventu e Protetzioni Tzivili. Nascit su programa Q3Lab, fatu de su Grupu Scout Agesci Quartu 3 e finantziau de s’Assessorau a is Servìtzius Sotzialis e a is Politicas Generatzionalis de su Comunu de Quartu ainturu de is progetus de coesioni sotziali.

13/05/2024: Is Candelaus: s’Academia Italiana de sa Coxina at ufizializau s’arretzeta. Est sa segunda borta chi s’Academia Italiana de sa Coxina, Delegatzioni de Casteddu, at presentau un’arretzeta traditzionali in sa “Casa Museo” Sa Dom’e Farra. Ocannu passau iant presentau “Sa còrdula cun pisurci”, ocannu "Is Candelaus de Quartu Sant’Aleni", cun un’iniziativa pùblica in programa giòbia 16 de maju 2024 a ora de is 18.30.

14/05/2024: Eventu stòricu in tzitadi: arribant in relìchias santas de Sant’Aleni. Un’eventu stòricu in sa Parròchia de riferimentu de sa tzitadi, cun fidelis de totu s’Ìsula. In Quartu is relìchias de Sant’Aleni, de su 18 a su 24 de maju 2024.

14/05/2024: Queeresima: su 18 de maju 2024 de Pratzza IV Novembre partit sa manifestatzioni po is diritus. Quartu aberrit sa “Queeresima 2024” cun una flacada manna, arregordendi is vùtimas de s’òdiu omo-lesbo-bi-trans-intersexfobia de totu su mundu.

15/05/2024: Biblioteca de Flùmini: laboratòriu ecològicu po pipius “Curiosape”. Po sa Dii mundiali de is abis”, chi s’afestat cada annu su 20 de maju, e finas ainturu de s’iniziativa “Maggio dei libri”, sa Biblioteca de Flùmini presentat “Curiosape” de Maria Lai, unu laboratòriu ecològicu creativu de letura a boxi arta cun is alunnus de sa classi 3^A de sa scola Primària debia Mar Ligure - IC6. S’iniziativa s’at a fai cenàbara, su 17 de maju 2024, a ora de 09.30.

15/05/2024: “Is pannus de is bisaius”: sa mostra promòvia de s’Assòtziu “Su Idanu”. Po sa de 25 bortas s’Assòtziu Folk Culturali Su Idanu promovit una mostra dedicada a is bistimentas nostas. Su 18 de maju 2024, a ora de is 18:00, in sa sedi debia Ignazio Perra 3, ddoi at s’inauguratzioni de s’editzioni noa: “Modas de Pasca manna”.

16/05/2024: Rassinnia “ViaConvento 2024”, Ottavio Olita presentat su liburu suu “Il rifugio dell'assassino”. Sèmpiri àinturu de sa Rassinnia “ViaConvento”, in sa sala de is pinturas de s’Ex Cunventu de Bia Brigata Sassari, sighint is initziativas po promovi sa literadura sarda. Mèrcuris, su 22 de maju 2024, a ora de is 18.00, s’at a presentai su romanzu de Ottavio Olita “Il rifugio dell'assassino”. N’arrexonat cun s’autori Paolo Lusci.

16/05/2024: Sa Dom’e Farra, eventù finali cun sa Comunità “Buon Gusto” de Quartu. Est acabendi sa segundu editzioni de su progetu de coesioni sotziali “La Comunità del Buon Gusto di Quartu Sant’Elena”, promòviu de sa Fundatzioni Carlo Enrico Giulini e finantziau de s’Assessorau a is Politicas Sotzialis de su Comunu de Quartu. Su30 de su mesi de maju 2024, a ora de is 18.00, in su Museu “Sa Dom’e Farra” de Quartu Sant’Aleni, s’at a fai un’iniziativa po sa populatzioni cun is cursistas de su progetu.

16/05/2024: Coesioni sotziali: laboratòrius de manualidadi po migrantis. Sighint is initziativas de is progetus de coesioni sotziali, finantziaus de s’Aministratzioni comunali e coordinaus de s’Assessorau a is Servitzius Sotzialis e a is Politicas Generatzionalis. Cun “Crea il tuo gioiello” cumentzat una filera de laboratòrius de manualidadi artìstica a favori de is giòvunus cun unu passau de migranti promòvias de Arcoiris ODV.

16/05/2024: “Teatro Impossibile”: su 28 de maju eventù de acabu progetu “Suoni di Lolla”. Su progetu de coesioni sotziali “Suoni di Lolla”acabat cun unu laboratòriu teatrali-musicalipo contai sa tzitadi po mèdiu de is domus stòricas. S’eventus’at a faiin sa Sala de s’Oratòriu de sa Basilica de Sant’Alenisu 28 de maju 2024, a ora de is 11:00. S’intrada est a indonu e no serbit a prenotai.

16/05/2024: “Bandiere Blu”in Quartu Sant’Aleni: arreconnoscimentu po Mari Pintau e Su Poetu. In Quartu s’editzioni 2024 de “Bandiere Blu”,arreconnoscimentu de parti de sa “Foundation for Environmental Education (Fee)” a logus de mari e turìsticus chi arrespetant crìteriusin contu de gestioni sustenìbili de su territòriu. Àinturu de is 236 localidadi italianas chi ant guadangiau su titulu ddoi at Quartu Sant’Aleni, cun Mari Pintau e cun Su Poetu.

17/05/2024: “Happy Run”: gara de cursa inclusiva sàbudu, su 25 de maju 2024, in su Parcu de Molentàrgius. Patrotzinau de su Comunu de Quartu e organizau de su “Rotary Club Quartu Sant’Elena”, su 25 de maju 2024, in su Parcu de Molentàrgius, s’at a fai s’“Happy Run”: manifestatzioni podistica po promovi s’inclusioni sotziali, s’atzessibìlidadì e su sport.

17/05/2024: Bullismu e Cyberbullismu: su coordinamentu tzitadinu aprontat s’annu nou. Quartu sighit a parai fronti a su bullismu e a su cyberbullismu. S’Aministratzioni comunali bolit afortiai su Coordinamentu contras a custus duus fenòmenus, unu progetu cumentzau apustis de sa pandemia chi at a sighiri cun oportunitadìs de svilupu noas. Unu primu atòbiu intra de is partis interessadas est in programa in su mesi de làmpadas.

17/05/2024: In su Tzentru Sòtziu Educativu su primu torneu de Risiko: si torrat a fai su 22 de maju 2024. Ant inaugurau sa sedi quartesa de su “Risiko! Club Sardegna” in su mesi de friaxu 2024, in sa sedi aberta de pagu tempus de s’Assessorau a is Servitzius Sotzialis e a is Politicas Intergeneratzionalis de pratza IV Novembre, e s’est acabau, apustis de duus mesis cun sa partecipatzioni de 25 giogadoris, su primu campionau de Risiko!, chi dd’at bintu Janko Madronic. Su torneu nou at a cumentzai mèrcuris, su 22 de maju 2024, cun iscritzionis a ora de is 21:00 e cumentzu a ora de is 21:30.

20/05/2024: In s’Archìviu stòricu ispiciocus de sa Porcu-Satta stùdiant ismudamentus sotzialis quartesus. Is giòvunus quartesus stùdiant sa cultura de sa tzitadi po castiai a su benidori cun prus cunfiàntzia. Su tziclu didàticu intra de s’Archìviu stòricu comunali e s’Istitutu Porcu-Satta est acabau cun arresurtu bonu, studiendi is statisticas e is documentus de s’Archìviu stòricu de Quartu Sant’Aleni.

20/05/2024: Aprovau s’aggiornamentu de su Pianu de is dismissionis e alienatzionis imobiliaris. Finsas sa sedi de su CTM in bia Brigata Sassari e sa “domu de su custodi” in Marina Residence (Tuerra) s’agatant àinturu de is benis chi si depint dismiti de parti de s’Aministratzioni Comunali de Quartu Sant’Aleni. Funt is novas chi s’agatant in s’integratzioni a su Pianu Triennali de is Valorizatzionis e Alienatzionis imobiliaris 2024-26, po s’annualidadi 2024, chi si podint ligi in s’ùrtimu delibera aprovada de sa Giunta su 17 de maju 2024.

21/05/2024: "GeneriAmo": eventù finali de su progetu de Donna Ceteris asuba de sa pedagogia de gèneriin scola. Apustis de 4 mesis de su cumentzu de is laboratòrius dedicaus a sa pedagogia de gèneriin is scolas, s'at a fai s'eventu de acabu progetu "GeneriAmo", promòviu de s'assòtziu Donna Ceteris. S'apuntamentuest po cenàbara, su 31 de maju 2024, a ora de is 12:00, in s'Àula Magna de s'Istitutu Tènicu Cumertziali Primo Levi.

21/05/2024: Biblioteca Flùmini: su 24 de maju 2024s'at a fai su laboratòriu ecològicu creativu de letura popipius. "In girotondo del carbonio" de Isabella Giorgini est su tìtulu de su laboratòriu de letura chi s'at a fai cenàbara, su 24 de maju 2024, a ora de is 09:00, in sa Biblioteca de Flùmini in bia Mar Ligure cun sa classi de infàntzia e primària de su "Progetu istrutzioni parentali" promòviu de s'Assòtziu culturali MAKTUB.

21/05/2024: Manovra de 14 millionis chi antìzipat s'Assestamentu de Bilàntziu: aprovau s'avantzu. Unu scusòrgiu de 14 millionis de èurus, cun sa metadi chi si podit gastai luegus etotu po is esigèntzias de s'Enti. Su Consillu comunali at aprovau s'avantzu de Bilàntziu chi ndi benit de s'aplicatzioni de s'arresurtau de Aministratzioni 2023, cun is fundus chi s'ant a podi gastai in s'annualidadi 2024.

22/05/2024: "Diritti in Comune": iniziativa in contu de diritus de is giòvunus. S'Assessorau a is Políticas Sotzialis de su Comunu de Quartu Sant'Aleni organizat, paris cun sa cooperativa Laurus chi tenit in gestioni is tzentrus Sòtziu Educativus Comunalis, s'iniziativa "Diritti in Comune", un'atzionide comunicatzioni e sensibilizatzioni, promòvia ainturu de s'acòrdiu ANCI e UNICEF Itàlia, poarregordai su ruolu de importu mannu de is Comunusin s'atuatzioni de is printzìpius stabilius de sa Cunventzioni ONU dedicata a is prus giòvunus.

24/05/2024: "ViaConvento": '111 luoghi di Cagliari da scoprire' de Daniela Zedda e Sergio Benoni. In s'Ex Cunventu appuntamentu nou cun sa rassinnia "ViaConvento 2024". Mèrcuris, su 29 de maju 2024, a ora de is 18:00, est in programa sa presentatzioni de s'òpera "111 Luoghi di Cagliari che devi proprio scoprire" de Daniela Zedda e Sergio Benoni. Giovanni Follesa nd'arrexonat cun s'autori.

24/05/2024: "ViaConvento": '111 luoghi di Cagliari da scoprire' de Daniela Zedda e Sergio Benoni. In s'Ex Cunventu appuntamentu nou cun sa rassinnia "ViaConvento 2024". Mèrcuris, su 29 de maju 2024, a ora de is 18:00, est in programa sa presentatzioni de s'òpera "111 Luoghi di Cagliari che devi proprio scoprire" de Daniela Zedda e Sergio Benoni. Giovanni Follesa nd'arrexonat cun s'autori.

25/05/2024: Sedi noa po is universitàrius: inaugurai in Quartu su Tzentru Sportivu Molentàrgius-Salinas. Nascit su Tzentru Universitàriu Sportivu Molentàrgius Salinas. Sa struttura de bia Perda Bona 22 in Quartu Sant'Aleni at a essi su logu po is amantiosus de sport, po su prus Triathlon, cun atletas e scuadras chi s'ant a podi allenai po is garas natzionalis e regionalis.

25/05/2024: Seminàriu contra a is tramperias: medas antzianus ant pigau parti a s'iniziativa in su Tzentru Sòtziu-Educativu. In su Tzentru Sòtziu-Educativu Intergeneratzionali s'est fatu su seminàriu contras a is fuglierias (trufas) a is antzianus. In sa sedi aberta in pratza IV Novembre de s'Assessorau a is Servitzius Sotzialis e a is Políticas Generatzionalis s'est fatu su seminàriu informativu po sa preventzioni de fuglierias e tramperias a is antzianus.

25/05/2024: Politzia Munitzipali: Regulamentu oràriu nou, turnus a de noti in istadi e po is festividades. Regulamentu oràriu nou po sa Politzia Munitzipali: su servìtziu de vigilàntzia s'at a fai finas a de noti, in istadi e po is festas.

27/05/2024: Telecàmeras noas in tzitadi: arresuras a favori de sa seguresa. Cumentzat su pianu de interventus po s'arretza de videosorvegliàntzia comunali, po torrai sceda a is esigèntzias de seguresa pùblica e de controllu de sa viabilidadadi. Sa delibera de Giunta Comunali cumentzat su programa de seguresa gràtzias a is investmentus chi ndi benint de s'avantzu de Aministratzioni.

27/05/2024: “Plant Swap”: in su Parcu Salinas Molentàrgius un’eventu de cumpartzidura e càmbias de matas. Cenàbara, su 07 de làmpadas 2024, de is oras 09:00 a is oras 12:30, in su Parcu de Molentàrgius, intrada de bia Don Giordi, est in programa s’eventu “Plant Swap”, dedicau a su cambiapari de matixeddas e prantas. S’apuntamentu, patrotzinau de su Comunu de Quartu, est aberu a totus is amantiosus de botànica e giardinàgiu, giòvunus, mannus e pipius.

28/05/2024: In sa “Social Gallery” de su 30 de maju 2024 sa mostra colletiva "REBELS". In sa The Social Gallery, sala espositiva in bia Eligio Porcu 43, apuntamentu nou cun su progetu “V-Art Quartu Exposition”. A sa mostra "REBELS" ndi pigant parti unus cantu artistas sardus. S’inauguratzioniest in programa su 30 de maju 2024, a ora de is 18:30.

28/05/2024: Ex Cunventu: diversidadi e inclusioni cun sa mostra fotogràfica “Luci Proprie”. “Sardinian People for the Queer Revolution APS” comunicat s’inauguratzioni de sa mostra fotogràfica “Luci Proprie”, aprontada de su fotògrafu Stefano Furesi. S’eventu de abertura s’at a fai su 31 de maju 2024 a ora de is 17:00 in su primu pianu de s’Ex Cunventu de is Paras de Quartu Sant’Aleni.

29/05/2024: Àteras duas cidas po s’assentai a su cursu de lingua sarda chi cumentzat giòbia, su 06 de su mesi de làmpadas 2024. Àteras duas cidas de tempus po s’assentai a su segundu cursu de lingua sarda, livellu basi, chi s’at a fai in su Tzentru Sòtziu Educativu a cumentzai de giòbia, su 06 de su mesi de làmpadas 2024, a ora de is 16:30. Su cursu est promòviu de s’Aministratzioni comunali in s’àmbitu de su progetu “Sa lingua in Quartu”. Is interessaus podint scarrigai su mòdulu e ddu podint imbiai a s’indiritzu: ufitziusardu24@gmail.com.

29/05/2024: Iscritzionis abertas po I-Sing: su laboratòriu de mùsica de sa Consulta Giòvunus de Quartu. Cumentzat un’initziativa de sa Consulta Giòvunus: unu laboratòriu musicali po agiudai is giòvunus amantiosus de mùsica a cantai, finas cun traballus de grupu e interativus.

30/05/2024: In bia Marghine s’eventu finali de su percursu poèticu teatrali “Matrilineare Connections”. Est in programa martis, su 04 de làmpadas 2024, a ora de is 20:00, in is giardinus debia Marghine in Quartu Sant’Aleni, sa performance “Matrilineare connections”, rapresentatzioni de su percursu poèticu teatrali dedicausa Dea Mama e ambientauin sa naturalesa, in is situs archeològicus e in is domus prus bellas de Quartu.

31/05/2024: Po sa rassinnia “Autori 2024” initziativa cun is studentis po su liburu de Gian Luca Sanna. In sa Biblioteca tzentrali apuntamentu nou cun sa rassinnia “Autori 2024”, chi finas ocannu at atobiau unus cantu scritoris. Lunis, su 03 de làmpadas 2024, a ora de is 17:30 s’at a presentai su liburu de Gian Luca Sanna: “Divieto di svolta”.

31/05/2024: Servìtziu Tzivili Universali: cumentzat s’atividadi in biblioteca de is duas picioas sceberadas cun RiBook. Duas picioas noas seletzionadas po su Servìtziu Tzivili Universali, in s’àmbitu de su progetu “RI-BOOK - Rete Interattiva di Biblioteche Operative Operanti in Kondivisione”, presentau de sa tzitadi metropolitana de Casteddu. Is duas picioas ant pigau servìtziu in sa Biblioteca Tzentrali.

31/05/2024: Sicànnia: su Comunu de Quartu Sant’Aleni decrarat su stadu de Calamidadi naturali. Po mori de sa sicànnia chi nd’est sunfrendi totu su territòriu cun dannus mannus a su setori agrìculu e zootènicu, su Comunu de Quartu Sant’Aleni at sceberau de deliberai, cunforma a s’art. 2 de sa L.R. n. 28 de su 21.11.1985, su stadu de Calamidadi Naturali.